

# **ҚАДИМ СУРХОН НАВОЛАРИ**

*(Аллалар ва Сурхондарё никоҳ тўйи  
маросими қўшиқлари)*

**«САНЪАТ» нашриёти  
ТОШКЕНТ – 2006 й.**

*Ёзib олувчи ва тўплаб нашрга тайёрловчи*

**МУЗАФФАР НАИМОВ**

*Масъул муҳаррир ва сўзбоши муаллифи  
филология фанлари доктори, профессор*

**МАМАТҚУЛ ЖЎРАЕВ**

*Халқ қўшиқлари миллий маданиятимизнинг энг қадимий ва умрбоқий бадиий силсилаидан бири бўлиб, ажододларимиз турмуш тарзи, анъаналари, орзу-интилишларининг ўзига хос қомусидир. Шунинг учун ҳам фольклор асарларини, айниқса, халқ қўшиқларини кенг оммалаштириш миллий ўзликни англашда муҳим аҳамият касб этади. Сурхондарё вилоятидан ёзib олинган халқ қўшиқлари тўплами ҳам ана шундай эзгу мақсадга хизмат қиласди.*

*Тўплам халқ оғзаки бадиий ижодиёти билан қизиқувчи кенг китобхонлар оммасига мўлжалланган.*

© М.Наймов, 2006.

© «Санъат» журнали нашриёти

## АСРЛАРГА БҮЙДОШ ҚҮШИҚЛАР

Маълумки, ўзбек ҳалқ қўшиқларининг бетакрор жозибасига мафтун бўлган ҳар қандай киши бу жавоҳир дурданаларини боболаримиз поэтик тафаккурининг сарчашмаларига ўхшатгиси келади. Очифини айтганда, бу – жуда тўғри қиёс. Зотан, бадий салоҳияти фоят баланд бўлган аждодларимизнинг беназир ижодий иқтидори туфайли юзага келиб, неча-неча асрлар ардоғида сайқалланган бундай фусункор оҳанглар ҳар қандай кишини сеҳрлаши табиий. Қолаверса, минг йиллар мобайнода эл-юртга жуда катта руҳий-маънавий қувват баҳш этиб келган ҳалқ қўшиқлари шонли тарихимизнинг бадий зарварақлари ҳамdir.

Ҳалқимиз қалбининг энг нафис ва нозик ҳиссиётлари тўлқини бўлмиш қўшиқлар миллий маънавиятимизнинг бебаҳо хазинаси ҳисобланади. Мисраларга айланган қанотли орзулар ҳамда гўзал ташбеҳларга йўғрилган ҳалқ қўшиқлари – ёр-ёр, ўлан, лапар, қелин салом ва хилма-хил тароналар ҳеч қачон тароватини йўқотмайди. Нафосат гулшанида унган бундай бадиият қатралари шахс маънавий комиллигининг илк сарчашмаси бўлибина қолмай, ўзида аждодларимизнинг яратувчилик, бунёдкорлик, эзгулик ва муҳаббат билан боғлиқ улуғвор қарашларини акс эттирганлиги учун ҳам умрбоқий қадриятлар тизимига айланган.

Ҳалқимизнинг асрларга бўйдош қўшиқлари ҳар қандай кишининг қалбини титратмай қўймайди. Истиқболи ойдин Ўзбекистонимизнинг қай бир сўлим гўшасига қадам қўйманг, мунис онахонларимизнинг оромижон алласию, ҳар сўзида қалб нури жилоланган мўъжизакор қўшиқларни тингламай қайтмайсиз. Ана шу бой маданий меросимиз хазйнаси – бадиий сўз дурданаларини тўплаш унинг ижодкорлари ва ижрочилари иқтидорига бўлган юксак эҳтиромнинг ўзига хос бир кўринишидир. Фольклор

асарларини ёзib олиш ва унинг энг яхши намуналарини кенг оммалаштириш халқимиз руҳияти, ўзига хос турмуш тарзи, орзу-интилишлари, қувончу ташвишларини ғоят теран ифодатаган қўшиқчилик санъати анъаналарини сақлаб қолиш ва келгуси авлодларга етказишда ҳам муҳим аҳамият қасб этади. Кўп минг йиллик тарихга эга бўлган ўзбек халқ қўшиқчилиги анъаналарини кўз қорачигидай авайлаб-асраш орқали унинг бизгача стиб келган тароналарини кенг кўламда ривожлантириш ва замондошлиаримиз бадиий салоҳияти воситасида янада тараққий эттириш бугунги кунимизнинг долзарб вазифаларидан биридир.

Шу жиҳатдан қараганда, Деновлик ёш муаллим, халқ оғзаки бадиий ижодиёти ва қўшиқчилик санъатининг чинакам ихлосманди Музаффар Наимовнинг Сурхондарё вилояти бўйлаб ўтказган кўп йиллик фольклор экспедициялари маҳсулу ўлароқ юзага келган “Қадим Сурхон наволари” номли қўшиқлар тўплами ҳам ана шундай эзгу изланишлар меваси саналади. Узоқ йиллар мобайнида Хайробод педагогика коллежида ёшларга сабоқ бериб келаётган М.Наимовнинг асли қасби — мутахассислиги мусиқа ўқитувчиси. Унинг момоси Руқия ая ҳамиша невараларини жозибадор алла оҳанглари остида ухлатишини яхши кўрар, узун қишлоғлари болаларини пинжига олиб, узундан-узун эртакларни, ибратли нақдларни ҳикоя қилиб берарди. Чунки у ғоят сўзга чечан, ҳар бир гапида ҳикматли сўзларни ўринли қўллайдиган, яъни “гапга гул қўндириб” гурунглашадиган дилбар инсон бўлган. Шунинг учун ҳам Музаффар жуда ёшлигиданоқ халқ оғзаки бадиий ижодиётига ихлос қўйди. ўрта мактабда, сўнгра Деновдаги мусиқа мактаби ҳамда Термиз мусиқа билим юртида ўқиб юрган кезларидаёқ адабиёт муаллимининг йўл-йўриқлари асосида алла, ёр-ёр, топишмоқ, мақол, эртак ва ривоятларни ёзib олди. Наврўз сайли ва тўй-ҳашамларга ташриф буюрган донгдор баҳшиларнинг достонлари ҳамда сержило дўмбира қўйларини жон қулоги билан берилиб тинглади. Ажиб бир энтикиш билан останаси тилло уй

бўсағаси олдида турган келинчакнинг пойига “ёр-ёр” у “ўлан” лардан пояндоз тўшайдиган аёлларнинг ижрочилик маҳорати уни, айниқса, ўзига ром этган эди. Шу боис Музаффар Наимов болалигиданоқ қадим Сурхон қўшиқларининг мафтуни бўлиб қолди. Аждодларимизнинг маънавий қадриятларини ўрганишга бўлган ҳавас Тошкент давлат консерваториясида таҳсил олган кезларида ҳам уни сира тарк этгани йўқ. Ҳар йили таътил бошланиши билан у ўз она диёри – Денов шаҳрига ошиқар ва ёз бўйи ўзининг севимли машғулоти – ҳалқ қўшиқларини тўплаш, ёзиб олиш, устозларидан ўрганганд мусиқий сабоқлари асосида ноталаштириш билан шуғулланди.

Ана шу фольклористик изланишлар натижасида “Сурхон қўшиқлари” номли икки қисмдан иборат китоби чоп эттирилди. Қолаверса, Ўзбекистонда хизмат кўрсаттансанъят арбоби, санъатшунослик доктори, профессор Рустам Абдуллаев раҳбарлигида Сурхондарё вилояти маросим фольклори мусиқаси бўйича номзодлик диссертацияси устида иш олиб бормоқда.

Ўзбек фольклорининг алла, ёр-ёр ва келин салом жанрларига оид бадиий матнлардан тузилган ушбу тўпламга Сурхондарё вилояти ҳалқ оғзаки бадиий ижодиётининг ҳудудий ўзига хослигини кўрсатувчи фольклор асарларигина киритилганлиги эътиборлиdir. Боботоғдан ёзиб олинган қуйидаги “алла”ни ўқир экансиз, беихтиёр ўз нури дийдасига бўлган меҳрини бениҳоя нозик ҳиссиётлар или ифода этган ижрочининг бетакрор маҳорати олдида лол қоласиз. Чунки бу “алла”да сўзлар шунчаки қуylanмайди, балки сўзлар рақс тушади, сўзлар бағридаги ҳадсиз меҳр булоги қайнаб-жўшади:

*Далада от бойладим,  
Жоним болам алла-ё.  
Айланиблар юрсин деб,  
Ширин болам алла.*

Ёки:

*Қир-адирнинг лоласиё, алла,  
Айланиб кетсин холасиё, алла,  
Қора уйнинг мўрисиё, алла,  
Энаси бўлсин чўрисиё, алла.*

Маълумки, Сурхон воҳаси фольклори ҳақида сўз юритганда беихтиёр неварасини тиззасига олганча авайлаб ухлатаётган боболар алласи – “хўя” ёки “хўёлло” жанри ёдга тушади. Диёrimizning бошқа гўшаларида учрамайдиган бу фольклор жанрига оид матнлар илк бор 1958–59 йилларда фольклоршунос Т. Мирзаев томонидан ёзил олинган. Лекин бу жанр намуналари ҳозирга қадар тўла тўпланиб, илмий ўрганилганича йўқ. Шунинг учун ҳам Музаффар Наимов томонидан тузилган мазкур тўпламга “хўёлло” қўшиқларининг ажойиб намуналари киритилганлиги муҳим илмий аҳамиятга эгадир. Олтинсой туманининг Катта Вахшивор қишлоғида истиқомат қилувчи Нарзулло Ҳотамовдан ёзил олинган “хўёлло” қўшиқларига жо бўлган самимият, халқимизга хос бағрикенглик ва меҳр-мурувватлиликнинг бекиёс бадиий талқини кишида ўчмас таассурот қолдиради:

*Сурув бўлсин подасия,, йу-ҳуй, йу-ҳуй, йу-ҳуй, йу-ҳуй,  
Янчоқ қолсин ходасия, йу-ҳуй, йу-ҳуй, йу-ҳуй, йу-ҳуй,  
Бир кун элга бош бўлсина, йу-ҳуй, йу-ҳуй, йу-ҳуй, йу-ҳуй,  
Кўп бўлсин садағасия, йу-ҳуй, йу-ҳуй, йу-ҳуй, йу-ҳуй.*

Тўпламда бундай таъсирчан мисралар, ижрочи қалбининг туб-тубидан оҳорланиб, товланиб чиқсан камалакдай сержило қўшиқлар жуда кўп. Ўйлайманки, бу китоб ўқувчини бефарқ қолдирмайди. Зоро Сурхон воҳасининг залворли тоғлари оша таралаётган асрий оҳанглар бизни боболаримиз тафаккурининг сирли мўъжизалари сари етаклайди.

**Маматқул ЖЎРАЕВ,**  
*филология фанлари доктори, профессор*

## АЛЛАЛАР

Кўзимнинг оқ-қораси, алла жонима, алла,  
Кўзимнинг нури дийдаси, алла жонима, алла.  
Бурнисини икки палласи, алла жонима, алла,  
Осмондаги ўлдузим, алла жонима, алла.  
Яқамдаги қундузим, алла жонима, алла.  
Алла айтиб боламниё ухлатайин, алла,  
Жоним болам қўзимга алла айтай, алла,  
Танамдаги жонимсан, алла болам, алла,  
Қалбимнинг сен меваси, ухла болам, алла.  
Сенга тилаб оламни тебратаман, алла,  
Соғлигингни тилайман оллоҳимдан, алла.  
Оллоҳ берди сени менга, жоним болам, алла,  
Ухлаб катта бўл тезда ширин болам, алла.  
Болдан ширин бўларми, жон боласи, алла,  
Жонимдан ортиқ кўрдим сиз боламни, алла.  
Эртанги сен қувончим катта бўлгин, алла,  
Отанг каби сен бир кун таянчим бўл, алла.  
Тофим бор деб ортимда суюнайин, алла,  
Келажагингдан ўзим қувонайин, алла.  
Одам бўлгин одамларнинг сен сараси, алла,  
Элга хизмат қил болам сен таянчим, алла.  
Шунда танам яйрайди, жоним болам, алла,  
Элда хизматда бўлсанг, ширин болам, алла.  
Оллоҳ фарзанд берибди бокира бўл, алла,  
Ростгўй оқил одам бўл, жоним болам, алла.  
Луқмаси пок одамнинг йўли равон, алла,  
Равон йўлдан юргин сен жоним болам, алла.  
Мендан ўсган дарахтим мевали бўл, алла,  
Меваларинг хор қилма азиз болам, алла.  
Никоҳ билан уй қурган ота-бобонг, алла,  
Сен покиза инсон бўл, жоним болам, алла (1).

\* \* \*

Алла, алла, аҳди бор-а, алла-ё, алла-ё,  
Үйқунинг ҳам вақти бор-а, алла-ё, алла-ё,  
Алла айтган энангниё, алла-ё, алла-ё,  
Қоп-қорайган бахти бор-а, алла-ё, алла-ё.

Дашту далада узум, алла-ё, алла-ё,  
Узганимни ким билар-а, алла-ё, алла-ё.  
Ҳасрату армон билан, алла-ё, алла-ё,  
Жон берганимни ким билар-а, алла-ё, алла-ё.

Сен суюкли эркатойим, алла-ё, алла-ё.  
Шўхликкина қўзичофим, алла-ё, алла-ё.  
Суйиб-суйиб ўпай сени, алла-ё, алла-ё,  
Ширингина дўмбоғим, алла-ё, алла-ё (2).

\* \* \*

Алла болам алла-ё,  
Жоним болам алла.  
Беқасам тўн кийгиздим  
Жоним болам алла-ё.  
Ярашиблар юрсин деб,  
Ширин болам алла.  
Белингга белбоғ ўратдим,  
Жоним болам алла-ё.  
Маҳкам ушлаб турсин деб,  
Ширин болам, алла.  
Далада от бойладим,  
Жоним болам, алла-ё.  
Айланиблар юрсин деб,  
Ширин болам, алла.

Умид билан боқдимо,  
Жоним болам, алла.  
Ўйнабгина юрсин деб,  
Ширин болам, алла.

Умид билан катта қилдим,  
Жоним болам, алла-ё.  
Чавандозлар бўлсин деб,  
Ширин болам, алла.

Сой ёқалаб кетайин,  
Жоним болам, алла.  
Сойдан бодом терайин,  
Ширин болам алла.

Тергангина бодомимни,  
Ширин болам, алла.  
Ўровингга<sup>1</sup> солайин,  
Жоним болам, алла.

Ўтовингнинг ичида,  
Жоним болам, алла.  
Жавлон уриб ётайин,  
Ширин болам, алла.

Алла болам оҳори<sup>2</sup>,  
Жоним болам, алла.  
Буғдой эккан наҳори,  
Ширин болам, алла.

---

<sup>1</sup> Ўровингга — чақалоқнинг ётоқ ўрни.

<sup>2</sup> Оҳори — жуда ғозик, гард тегмаган.

Чумчуқ есин донини,  
Жоним болам, алла.  
Дуо қилсин доимо,  
Шу боламнинг жонини.  
Алла болам, йигитим,  
Жоним болам, алла.  
Баҳор эккан чигитим,  
Ширин болам, алла.  
Униб чиқсан мулойим, аллаё,  
Болагинамнинг жонини  
Асрасина худойим, алла.

Пиёлага пиёзим,  
Жоним болам, алла.  
Билаб олган ниёзим,  
Ширин болам, алла.

Пиёлага пиёз қиз,  
Жоним болам, алла.  
Хўжасига ниёз қиз,  
Ширин болам, алла.

Алла болам ёйдайин,  
Жоним болам, алла.  
Ёйлик чиққан кундайин,  
Ширин болам, алла.  
Алла болам алла-ё,  
Ширин болам алла-ё, алла (3).

\* \* \*

Болажоним сардориё, алла  
Юрагимнинг дармониё, алла.  
Ухла қизим, алла-ё, алла,  
Ширин тойим, алла-ё, алла.

Тебратадиган опанг бора, алла,  
Алла айтай тинглагина, алла,  
Қулоқ солиб ухлагина, алла,  
Зардолининг танасиё, алла.

Ўргилсино аммасиё, алла,  
Ёғ кадининг латтасиё, алла.  
Айлансинда холасиё, алла,  
Хабар олсин тоғасиё, алла (4).

\* \* \*

Сув кадининг латтасиё, алла,  
Айланиб кетсин отасиё, алла.  
Катта тутнинг танасиё, алла,  
Айланиб кетсин энасиё, алла.

Чоригининг пошнасиё, алла,  
Айланиб кетсин ошнасиё, алла.  
Чинни чойнакнинг шаммасиё, алла,  
Айланиб кетсин аммасиё, алла.

Қир-адирнинг лоласиё, алла,  
Айланиб кетсин холасиё, алла.  
Қора уйнинг мўрисиё, алла,  
Энаси бўлсин чўрисиё, алла (5).

\* \* \*

Алла болам, жотагаё, алла,  
Гул достикқа ботагаё, алла.  
Аллайов алла, аллаё алла.  
Етти ойлик вақтингда, аллаё алла.  
Отанг кетди урушга, алла.  
Урушлари қурисино, аллаё алла,  
Душманларга ўт тушсино, аллаё алла,  
Аллайов алла, аллаё алла.

Душманларнинг деволиё, алла,  
Ўрмалайди чумоли, аллаё алла.  
Чумолига жўқмидиё, аллаё алла,  
Бегуноҳлар уволиё, алла,  
Аллайов алла, аллаё алла.

Отанг журган жўлларга, аллаё алла,  
Гул чамбарлар очилсино, алла.  
Душман юрган жўлларгаё, аллаё алла,  
Чақир тикон босилсино, алла.  
Аллайов алла, аллаё алла.

Чирофим бор ўнинчи, аллаё алла,  
Пилиги ўн биринчи, алла.  
Солдатларнинг ичидәё, аллаё алла,  
Отагинанг биринчиё, аллаё алла.  
Аллайов алла, аллаё алла.

Қора ўйдинг жопсари<sup>1</sup>, аллаё алла,  
Очиб қаранг ким сари, алла.  
Жопсар жориб қарасам, алла,  
Куёв қонниқ қопсари<sup>2</sup>, алла.  
Аллайов алла, аллаё алла (6).

\* \* \*

Алла жоним айлансин, аллаё алла,  
Белинг маҳкам боғлансин, аллаё алла.  
Худойжоним умр бериб, аллаё алла,  
Боғинг маҳкам боғлансин, аллаё алла.

<sup>1</sup> Жопсари — ёпғич.

<sup>2</sup> Қопсари — семиз, бақалюқ.

Қошинг қаро ё қундуз, аллаё алла,  
Кеча ухла ё қундуз, аллаё алла.  
Сенга ҳамроҳ бўлсин, аллаё алла.  
Кеча билан кундузей, аллаё алла.

Бошинг эсон бўлсина, аллаё алла,  
Умринг узоқ бўлсина, аллаё алла.  
Ота-онанг омон бўлиб, аллаё алла,  
Сени катта қилсина, аллаё алла.

Югуриб йўлларга кирсин, аллаё алла,  
Боғлардан гуллар терсин, аллаё алла.  
Бобо-момонг келганда, аллаё алла,  
Тезда салом бергина, аллаё алла.

Ой нечага-нечага, аллаё алла,  
Булбул қўнар гул фунчага, аллаё алла.  
Алла айтиб берайин, аллаё алла,  
Сендайгина бачага, аллаё алла (7).

\* \* \*

Худо берган эрмагим,  
Шоли билан қурмагим,  
Жоним болам, алла.

Айланайин айвоним,  
Юрчи билан Деновим,  
Қўзим болам, алла.

Қариганда боқарим,  
Чироғимни ёқарим,  
Ширин болам, алла.

Сум<sup>4</sup> сариқ, сочим сариқ,  
Сарғайганимни ким билар,  
Жоним болам, алла.

Бу мусоғир юртига,  
Жон берганимни ким билар,  
Шириң болам, алла.

Кўзимдан оққан ёшга,  
Сен ҳайронлар бўлмагин,  
Жоним болам, алла.

\* \* \*

Белгинамнинг қуввати,  
Жоним болам, алла.  
Тилгинамнинг узуни,  
Шириң болам, алла.

Давраларда сўзлар сўзим,  
Жоним болам, аллаё.  
Чақнаб турган чақмоқ кўзим,  
Шириң болам, аллаё.

Саҳарлаб уйғонадурман,  
Жоним болам, аллаё.  
Илондек чўлғонадурман,  
Шириң болам, алла.

Иним ёдимга тушганда,  
Жоним болам, аллаё.  
Худо деб ёлворадурман,  
Шириң болам, алла (8).

---

<sup>4</sup> Сум — ранг, рўй.

## ҲУЙО-ҲУЙ

Ҳую болам, ҳую-ҳуй  
Ҳую-ҳуй, талқон туй.  
Бир коса сув, бетингни жув,  
Ҳую болам, ҳую-ҳуй.

Чамбил белдан от қочирдим,  
Изи жўқ, ҳую болам, ҳую-ҳуй.  
Қирқ жигитга май ичирдим,  
Тузи жўқ, ҳую болам, ҳую-ҳуй.  
Ҳуйолар қилай боламдия, ҳую-ҳуй,  
Жўлларига солай тумандия, ҳую-ҳуй.  
Туялар бўйин эгканда, ҳую-ҳуй,  
Миндирайинда боламдия, ҳую-ҳуй.

Муродбойим от чопсина, ҳую-ҳуй,  
От устида мол топсина, ҳую-ҳуй.  
Катта чопоғон бўлсина, ҳую-ҳуй,  
Улисини<sup>1</sup> унгарсин, ҳую-ҳуй,  
Тирисини<sup>2</sup> ҳайдатсина, ҳую-ҳуй.

Мўл бўлсинда рисқисия, ҳую-ҳуй,  
Тўкин бўлсин рўзгориё, ҳую-ҳуй.  
Дастурхони нондан тўлсин, ҳую-ҳуй,  
Дондан тўлсин омборлари, ҳую-ҳуй.  
Қўйдан тўлсин қўтония, ҳую-ҳуй,  
Молдан тўлсин жайловия, ҳую-ҳуй (1).

<sup>1</sup> Улисини ўнгарсин — улушини, улоғини ажратсин.

<sup>2</sup> Тирисини ҳайдатсин — ажратган мол, улоғларни подага қўшиш.

\* \* \*

Келгин болам тиззамга,  
Ёл<sup>1</sup> буларсан ўзимга,  
Кулоқ согин сўзимга  
Хуйо болам, хуйо.

Жоним болам от чопсин,  
Отига баҳмал ёпсин,  
Хуйя солсин отаси,  
Орқасидан ёл топсин,  
Хуйё болам, хуйё.

Болам сен ҳам ботирим,  
Чопиб келаётири.  
Чўпон бўлсанг қўйларга  
Боқарсан ўтлоқ, сойларга  
Хуйё болам, хуйё.

Хуйё-хуйё, хуйёнг қани?  
Бованг берган туянг қани?  
Бованг берган туянг бўлса,  
Боқиб юрганларинг қани?  
Боқиб юрган туянг бўлса,  
Адир ҳам чўлларинг қани?

Хуйё қилай ҳайдага,  
Оting согин тўдага.  
Хуйё қилсам ухлагин,  
Отанг сендан садага  
Хуйё болам, хуйё-и-и! (2).

---

<sup>1</sup> Ёл — ҳамроҳ.

\* \* \*

Хүёлло буваси қашқа, йу-хуй, йу-хуй, йу-хуй, йу-хуй,  
Хўкизи киради мошга, йу-хуй, йу-хуй, йу-хуй, йу-хуй,  
Кўшга илдам бўймаса-я, йу-хуй, йу-хуй, йу-хуй, йу-хуй,  
Қайла қилинглар гўштга йу-хуй, йу-хуй, йу-хуй, йу-хуй,  
Терисини сийириб-а, йу-хуй, йу-хуй, йу-хуй, йу-хуй,  
Пичинглар кўп ковушга, йу-хуй, йу-хуй, йу-хуй, йу-хуй.

Бир жуп беринг Бувишга, йу-хуй, йу-хуй, йу-хуй, йу-хуй,  
Яна бир жуп Кумушга, йу-хуй, йу-хуй, йу-хуй, йу-хуй,  
Қолгани эли-хешга, йу-хуй, йу-хуй, йу-хуй, йу-хуй.

Ола чипор оёғи, йу-хуй, йу-хуй, йу-хуй, йу-хуй,  
Темирдайн түёғи, йу-хуй, йу-хуй, йу-хуй, йу-хуй,  
Хўёлла айтай хуй бўлгина, йу-хуй, йу-хуй, йу-хуй, йу-хуй,  
Ювошгина қўй бўлгина, йу-хуй, йу-хуй, йу-хуй, йу-хуй,  
Худойимдан тиладима, йу-хуй, йу-хуй, йу-хуй, йу-хуй,  
Катта бўлгин, тўй бўлгин-а, йу-хуй, йу-хуй, йу-хуй.

Бувагинанг даласи-я, йу-хуй, йу-хуй, йу-хуй, йу-хуй,  
Хўқизининг малласи, йу-хуй, йу-хуй, йу-хуй, йу-хуй,  
Юрагимди эзади-я, йу-хуй, йу-хуй, йу-хуй, йу-хуй,  
Момосининг алласи, йу-хуй, йу-хуй, йу-хуй, йу-хуй.

Холаси холдор бўлсино, йу-хуй, йу-хуй, йу-хуй, йу-хуй,  
Шу болам молдор бўлсин-а, йу-хуй, йу-хуй, йу-хуй, йу-хуй,  
Шохдор-шохдор ҳўқизлара, йу-хуй, йу-хуй, йу-хуй, йу-хуй,  
Тулпори ёлдор<sup>1</sup> бўлсина, йу-хуй, йу-хуй, йу-хуй.

Ё худойим ёш берсина, йу-хуй, йу-хуй, йу-хуй, йу-хуй,  
Қозон тўла ош берсина, йу-хуй, йу-хуй, йу-хуй, йу-хуй,  
Шу йигитнинг баҳтига, йу-хуй, йу-хуй, йу-хуй, йу-хуй,  
Бир ёш қаламқош берсина, йу-хуй, йу-хуй, йу-хуй, йу-хуй.

---

<sup>1</sup> Ёлдор – ҳаивонлар гарданида бўладиган узун соч.

Оппоқ бўлсин соқоли-я, йу-хуй, йу-хуй, йу-хуй, йу-хуй,  
Отлар минсин тақалиё, йу-хуй, йу-хуй, йу-хуй, йу-хуй,  
Чирозлари ярашган, йу-хуй, йу-хуй, йу-хуй, йу-хуй,  
Тўнлар кийсин, ёқали-я, йу-хуй, йу-хуй, йу-хуй, йу-хуй,

Сурув бўлсин подасия, йу-хуй, йу-хуй, йу-хуй, йу-хуй,  
Янчкоқ қолсин ходасия, йу-хуй, йу-хуй, йу-хуй, йу-хуй,  
Бир кун элга бош бўлсина, йу-хуй, йу-хуй, йу-хуй, йу-хуй,  
Кўп бўлсин садағасия<sup>1</sup>, йу-хуй, йу-хуй, йу-хуй.

Камар<sup>2</sup> боши товаси, йу-хуй, йу-хуй, йу-хуй, йу-хуй,  
Тоғларининг лоласи, йу-хуй, йу-хуй, йу-хуй, йу-хуй,  
Бувасининг боласия, йу-хуй, йу-хуй, йу-хуй, йу-хуй,  
Келсин ҳар ким ҳаваси, йу-хуй, йу-хуй, йу-хуй, йу-хуй.

Ярашади қилиғи, йу-хуй, йу-хуй, йу-хуй, йу-хуй,  
Қошларининг пилиги, йу-хуй, йу-хуй, йу-хуй, йу-хуй,  
Полвон бўлсин худойим-а, йу-хуй, йу-хуй, йу-хуй, йу-хуй,  
Тўла бўлсин илиги-я, йу-хуй, йу-хуй, йу-хуй.

Қишда қалин қор бўлсин-а, йу-хуй, йу-хуй, йу-хуй, йу-хуй,  
Элга номус-ор бўлсина, йу-хуй, йу-хуй, йу-хуй, йу-хуй,  
Катта-кичик ҳаммага, йу-хуй, йу-хуй, йу-хуй, йу-хуй,  
Худо мададкор бўлсина, йу-хуй, йу-хуй, йу-хуй, йу-хуй (3).

---

<sup>1</sup> Садаға — қурбонинг бўлай, ўргилай.

<sup>2</sup> Камар — сув ювиши натижасида пайдобўлган ўйиқ жой.

## “ЁР-ЁР”

Нима кийсанг ярашади,  
Бўйгинанга ёр-ёрей, ёр-ёрей.  
Ўлан айтай деб келдимо,  
Тўйгинанга ёр-ёрей, ёр-ёрей.

Отант қилган бу эшик,  
Ёпилмайди ёр-ёрей, ёр-ёрей.  
Шу қиз тенги дунёда,  
Топилмайди ёр-ёрей, ёр-ёрей.

Ҳай, ҳай ўлан, жон ўлан,  
Кимни тўйи ёр-ёрей, ёр-ёрей.  
Оқ гул билан қизил гул,  
Қизни тўйи ёр-ёрей, ёр-ёрей.

От боғлаган қозиқни,  
Ўтов денглар ёр-ёрей, ёр-ёрей.  
Келин келган эшикни,  
Тилло денглар ёр-ёрей, ёр-ёрей.

Ҳай, ҳай ўлан, жон ўлан  
Саккиз денглар ёр-ёрей, ёр-ёрей.  
Саккиз боғда очилган,  
Гул лоламиз ёр-ёрей, ёр-ёрей.  
Саккиз қизни сардори,  
Биз бўламиз ёр-ёрей, ёр-ёрей.

Офтобага сув қуйманг,  
Тошар кетар ёр-ёрей, ёр-ёрей.  
Узокларга қиз берманг,  
Олар кетар ёр-ёрей, ёр-ёрей.  
Куда холам томиниё,

Толдан ёпган ёр-ёрей, ёр-ёрей.  
Унинг тол ёғочини,  
Қайдан олган ёр-ёрей, ёр-ёрей (1).

\* \* \*

Сойдан чиққан қамишни, ёр-ёрей,  
Чойдишга<sup>1</sup> сол қайнасин, ёр-ёрей.  
Икки мўмин ёр бўлди, ёр-ёрей,  
Қарсак чалинг ўйнасин, ёр-ёрей.

Рўмолим бор ҳарирдан, ёр-ёрей,  
Қизил гулнинг баргидан, ёр-ёрей.  
Ўтирсам туролмайман, ёр-ёрей,  
Ошиқликнинг дардидан, ёр-ёрей.

Қоши энди кўзингдан, ёр-ёрей,  
Ширин энди сўзингдан, ёр-ёрей.  
Ёринг ўзи айлансан, ёр-ёрей,  
Босган энди изингдан, ёр-ёрей.

Меҳмонхона ўчоги, ёр-ёрей,  
Кўкча қовун пўчоги, ёр-ёрей.  
Жигитларга шириндир, ёр-ёрей,  
Келин ойнинг қучоги, ёр-ёрей.

Келин ойнинг лабларида,  
Холи бордир ёр-ёрей.  
Куёвжонга гап берганда,  
Тилларида боли бор, ёр-ёрей.

Эшик олди мошпоя, ёр-ёрей,  
Барги бошимга соя, ёр-ёрей.

---

<sup>1</sup> Чойдиш — сув қайнатадиган қумгон.

Ҳамма дардга бор даво, ёр-ёрей,  
Ошиқликка йўқ даво, ёр-ёрей.

Олма берсам олмайсан, ёр-ёрей,  
Беҳи берсам кўнмайсан, ёр-ёрей.  
Қайси боғнинг гулисан, ёр-ёрей,  
Қандай бойнинг қизисан, ёр-ёрей.

Пиёлага чой қуидим, ёр-ёрей,  
Чайқамангиз, тўкмангиз, ёр-ёрей.  
Менга ваъда берсангиз, ёр-ёрей,  
Урушмангиз, сўкмангиз, ёр-ёрей.

Жар ёқалаб қишлидим, ёр-ёрей,  
Жардана чумчуқ ушладим, ёр-ёрей.  
Дўнг юрдимда, паст юрдим, ёр-ёрей,  
Сен қизнингда хушладим, ёр-ёрей.

Бозорларга бораман, ёр-ёрей,  
Тилло узук оламан, ёр-ёрей.  
Ўнг ёғингдан кираман, ёр-ёрей,  
Қўлингга узук соламан, ёр-ёрей.  
Отанг арzon берсалар, ёр-ёрей,  
Сени ўзим оламан, ёр-ёрей.

Осмонда ой ботмасин, ёр-ёрей,  
Келин келган кечаси, ёр-ёрей.  
Ҳаволар ёғиб ётмасин, ёр-ёрей,  
Тўйга келган момолар, ёр-ёрей,  
Тағин тойиниб кетмасин, ёр-ёрей.

Толдан тобоқ ёр-ёрей,  
Тўйга келган момоларнинг,  
Дарди томоқ, ёр-ёрей.

Толдан қошиқ, ёр-ёрей,  
Куёв йигит олган ёри,  
Олтин қошиқ, ёр-ёрей.  
Сув келади пахса-пахса, ёр-ёрей,  
Пойизингди жули тохта, ёр-ёрей.  
Кўп йигитларнинг ичида, ёр-ёрей,  
Куёв йигитни мақта, ёр-ёрей.

Чироқлари бешинчи, ёр-ёрей,  
Пилиги ўн биринчи, ёр-ёрей.  
Йигитларнинг ичида, ёр-ёрей,  
Куёв жигит биринчи, ёр-ёрей (2).

\* \* \*

Икки ёнма-ён,  
Бўй беради ёр-ёр.  
Икки қуда тенг туриб,  
Тўй беради ёр-ёр.

Чимилдиқнинг богини  
Тўқитганмиз ёр-ёр.  
Бизни қизни сўрасангиз  
Ўқитганмиз ёр-ёр.

Куёв тўра уйларини  
Толдан ёпган ёр-ёр.  
Шундай гўзал келинчакни  
Қайдан топган ёр-ёр.

Осмондаги юлдузни  
Саккиз денглар ёр-ёр.  
Саккиз қизни сардори  
Келди денглар ёр-ёр.

Бўз йигитнинг бўйнига  
Тумор бўлдим ёр-ёр.  
Севган ёрим юракда  
Хумор бўлдим ёр-ёр.

Ола қопдан отининг  
Хўржини бор ёр-ёр.  
Бўз йигит ҳеч билмаган  
Сирларим бор ёр-ёр.

Қўлларимдан бўз йигит  
Ушламаган ёр-ёр.  
Севганингиз борми деб  
Сўрамаган ёр-ёр.

Ориятли хон қизи  
Кетаётир ёр-ёр.  
Армонлари қалбида  
Ёнаётир ёр-ёр.

Саккиз қизни сардори Биз бўламиз ёр-ёр. Номозшомда очилган Гул бўламиз ёр-ёр.	Айтай десам севгани Камбагалдир ёр-ёр. Отасию-онаси ҳеч розимас ёр-ёр, Камбағал кўшни йигит қолаётир ёр-ёр, Ориятли келинчак кетаётир ёр-ёр.
Мен отимни қўшмайман Ёмон отга ёр-ёр. Қандай жавоб берамано Қиёматга ёр-ёр.	Сўзларга тилим ожиз – ёр кетади ёр-ёр, Севганим бор диёлмас – зор кетади ёр-ёр. Оллоҳимга топширдим сиз йигитни ёр-ёр, Вафосиз ёр кетди деб сўз айтмангиз ёр-ёр.
Чимилидинг чип-чинор Бўйинг чинор ёр-ёр. Бўйинга кўз тегмасин Олгин тумор ёр-ёр.	Ор номусдан йиглайди менинг қалбим ёр-ёр, Дилдан йиглаб кетадир бу муҳаббат ёр-ёр. Бўз йигитга тиладим бойчипор от ёр-ёр, Минса қувнаб яйрасин ул чипор от ёр-ёр (3).
От минибди бўз йигит Бўзлаб-бўзлаб ёр-ёр. Минган оти саманми Ё жийронми ёр-ёр.	

\* \* \*

Тахта-тахта кўпирик,  
Тахтинг бўлсин, ёр-ёр.  
Пайғамбарнинг қизидай  
Бахтинг бўлсин, ёр-ёр.

Пайғамбарни қизини  
Ким кўрибди, ёр-ёр.  
Ота-она уйидан  
Ким тўйибди, ёр-ёр.

Оқ кўйлагим чокини  
Сўтдим<sup>12</sup> она ёр-ёр.  
Оқ сутинга рози бўл  
Кетдим она ёр-ёр.

Ота-онам уйида  
Бир гул эдим ёр-ёр.  
Қафасда сайраб турган  
Булбул эдим ёр-ёр.

Қафасимни ёнидан  
Учди қушим ёр-ёр.  
Бегона бир жойларга  
Тушди қушим ёр-ёр.

Оқ теракнинг шохини  
Ким қайирди ёр-ёр.  
Келин қизни онасидан  
Ким айирди ёр-ёр.

Оқ остона остига  
Отам ётар ёр-ёр.  
Оқ бўз отни юборса  
Келмай ётар ёр-ёр.

Бориб айтинг жаброилга  
Жавоб берсин ёр-ёр.  
Етиб келсин қизларининг  
Тўйларига ёр-ёр.

---

<sup>12</sup> Сўтмоқ — тикилган жойидан, чокидан ечиш.

Кадидаги қатиқни  
Ким тўкибди ёр-ёр.  
Кетаётган қизимни  
Ким сўкибди ёр-ёр.

Қат-қатгина қатлама  
Қатланибди ёр-ёр.  
Қизни олиб янгаси-ё  
Отланибди ёр-ёр.

Ҳай-ҳай ўлан жон ўлан  
Ўланмисиз ёр-ёр.  
Саккиз беҳишт ичидা  
Сардормисиз ёр-ёр.

Оқ милтиқ, қора милтиқ  
Отган отам ёр-ёр.  
Ўз қизини кўп пулга  
Сотган отам ёр-ёр.

Ўз қизини йўлига  
Бодом эксин ёр-ёр.  
Бодом шохи қайрилса  
Болам десин ёр-ёр.

Олисда тушган қизнинг  
Ранги сариқ ёр-ёр.  
Кўзидан ёши оқар  
Мисли ариқ ёр-ёр (4).

## **КЕЛИН САЛОМ**

Кайвони: Аввало оллоҳимга салом  
Азизу авлиёларга салом  
Биби Фотима, Биби Зухра  
Сизларга салом.

Аёллар: Ҳазор алик, қуллуқ.

Кайвони Жаброилу Расулуллоҳ,  
Сизларга салом.  
Иброҳим Халилуллоҳ  
Сизларга салом.

Аёллар: Ҳазор алик, қуллуқ.

Кайвони: Ё Муҳаммад, сизга салом,  
Одам ато, момо ҳаво сизга салом.  
Ўн саккиз минг оламнинг сарвари сизга салом.

Аёллар: Ҳазор алик, қуллуқ

Кайвони: Маккатилло йўлида,  
Чор китоби қўлида,  
Қайнота бувасига салом!

Аёллар: Ҳазор алик, қуллуқ.

Кайвони: Юзлари бор ойдек,  
Қош кўзлари ёйдек,  
Қуда холага салом.

Аёллар: Ҳазор алик, қуллуқ.

Кайвони: Уй айланиб иш қилган,  
Қўли ювуқсиз ош қилган.  
Янгаларига салом!

Аёллар: Ҳазор алик, қуллуқ.

Кайвони: Томга чиқса норвондек,  
Икки күзи алвондек,  
Қадам ташлар полвондек,  
Куёв болага салом!  
Аёллар: Ҳазор алик, қуллуқ.

Кайвони: Бошга рўмол ўраган,  
Тўй қачон деб сўраган,  
Кўшниларига салом!  
Аёллар: Ҳазор алик, қуллуқ (1).

\* \* \*

Кайвони: Буғдој узум фўраси,  
Куёвбекнинг жўраси,  
Норғулойнинг тўраси  
Баҳром акасига салом!  
Аёллар: Ҳазор алик, қуллуқ.

Кайвони: Бўш қозонга ош бошлаган,  
Икки ёшга бош бўлган,  
Қайнотасига салом.  
Аёллар: Ҳазор алик, қуллуқ.

Кайвони: Тол бешикка таянган,  
Ўғлим бор деб суюнган,  
Қайнонасига салом.  
Аёллар: Ҳазор алик, қуллуқ.

Кайвони: Осмондаги юлдуздек  
Қоши қора қундуздек,  
Дили ойдин қундуздек  
Қайнонасига салом!  
Аёллар: Ҳазор алик, қуллуқ.

Кайвони: Отга минса минордек,  
Отдан тушса чинордек,  
Куёв жўраларига салом.  
Аёллар: Ҳазор алик, қуллуқ.

Кайвони: Ошга солган иликдек,  
Қошу кўзи пиликдек  
Келин дугоналарига салом  
Аёллар: Ҳазор алик қуллуқ. (2).

\* \* \*

Кайвони: Мирза терак ўстирган,  
Файратли ўғил ўстирган,  
Қайнонасига бир жуфт салом.  
Аёллар: Раҳмат, қуллуқ.

Кайвони: Беқасам тўн жоғаси<sup>1</sup>,  
Айлансинда тоғаси,  
Тоғаларига бир жуфт салом.  
Аёллар: Раҳмат, қуллуқ.

Кайвони: Қирмизи чойнак шаммаси,  
Айлансинда аммаси,  
Аммаларига бир жуфт салом.  
Аёллар: Раҳмат, қуллуқ.

Кайвони: Далаларнинг лоласи,  
Айлансинда холаси,  
Холаларига бир жуфт салом.  
Аёллар: Раҳмат, қуллуқ.

---

<sup>1</sup> Жоғаси — ёқаси.

Кайвони: Қозонини қириллатган,  
Чақасини чириллатган,  
Қайнбаччаларига бир жуфт салом.  
Аёллар: Раҳмат, қуллуқ.

Кайвони: Қўйлари қумларни жойлаган,  
Корсондай қўйруқ бойлаган,  
Чўпон акаларига бир жуфт салом.  
Аёллар: Раҳмат, қуллуқ.

Кайвони: Эшагини их деган,  
Носвойини туф деган,  
Боболарига бир жуфт салом.  
Аёллар: Раҳмат, қуллуқ.

Кайвони: Келин қандай экан деб,  
Қўш овулдан сўраган,  
Совчиларга бир жуфт салом.  
Аёллар: Раҳмат, қуллуқ.

Кайвони: Токчадаги пачка пулдай,  
Очилмаган атир гулдай,  
Қайинсингилларига бир жуфт салом.  
Аёллар: Раҳмат, қуллуқ.

Кайвони: Телпагини қайирган,  
Ҳамма жойдан ҳақини айирган,  
Тоғаларига бир жуфт салом.  
Аёллар: Раҳмат, қуллуқ (3).

\* \* \*

Кайвони: Боғда узум фўраси,  
Раисларнинг жўраси,  
Тоғасига бир салом.

- Аёллар: Қуллуқ, кўп яшанг!
- Кайвони: Бозорга бориб чой олган,  
Сой олдидан жой олган,  
Ақаларига бир салом.
- Аёллар: Қуллуқ, кўп яшанг!
- Кайвони: Киши ҳақини емаган,  
Ҳеч қаердан қолмаган,  
Боболарига бир салом.
- Аёллар: Қуллуқ, кўп яшанг!
- Кайвони: Қалпоғини қайирган,  
Тўйдан улоқ айирган.  
Чопағон амакиларига бир салом.
- Аёллар: Қуллуқ, кўп яшанг!
- Кайвони: Очилганда гулдай бўлган,  
Ҳаммаларига бирдай бўлган,  
Қайнисингилларига бир салом.
- Аёллар: Қуллуқ, кўп яшанг!
- Кайвони: Бақилдоғи<sup>1</sup> ойнадай,  
Ёйилиб оққан дарёдай,  
Овсинларига бир салом.
- Аёллар: Қуллуқ, кўп яшанг!
- Кайвони: Оёғида маҳсиси,  
Боболарнинг яххиси,  
Қайнаталарига бир салом.
- Аёллар: Қуллуқ, кўп яшанг!

---

<sup>1</sup> Бақилдоғ — бўйинга осадиган тақинчоқ.

Кайвони: Орқасини чуватган<sup>1</sup>,  
Невараларини юпатган,  
Момаларига бир салом.  
Аёллар: Қуллуқ, кўп яшанг!

Кайвони: Яланг кўйлак киймаган,  
Яланг оёқ журмаган,  
Холаларига бир салом.  
Аёллар: Қуллуқ, кўп яшанг! (4)

\* \* \*

Кайвони: Эшиб<sup>2</sup> қўйган ипакдай,  
Қоши кўзи пупакдай,  
Келин салом бир салом,  
Келинларига салом.  
Аёллар: Балли қуллуқ, ҳазор алик!

Кайвони: Қизил олманинг пўсти,  
Куёв йигитнинг дўсти,  
Келин салом бир салом,  
Куёв жўраларига салом.  
Аёллар: Балли қуллуқ, ҳазор алик!

Кайвони: Қора қўйнинг барраси,  
Йигитларнинг сараси,  
Келин салом бир салом,  
Куёв тўрага салом.  
Аёллар: Балли қуллуқ, ҳазор алик!

---

<sup>1</sup> Чуватиш — ёш болаларнинг ўралашиб юриши.

<sup>2</sup> Эшмоқ — айлантириб, бураб, товлад пишиқ қилмоқ.

Кайвони: Чилдирмани чалдирган,  
Хотин-қизни йиғидирган,  
Келин салом бир салом,  
Санъаткорларга салом.  
Аёллар: Балли қуллуқ, ҳазор алик!

Кайвони: Ҳовлисидан йўл берган,  
Қўтанидан<sup>1</sup> қўй берган,  
Келин салом бир салом,  
Қайнотасига салом.  
Аёллар: Балли қуллуқ, ҳазор алик!

Кайвони: Ўчоқ бошдан уйрилган<sup>2</sup>,  
Ўғил туғиб керилган,  
Келин салом бир салом,  
Қайнонасига салом.  
Аёллар: Балли қуллуқ, ҳазор алик!

Кайвони: Тўлиб оққан сойдайин,  
Ўн тўрт кунлик ойдайин,  
Келин салом бир салом,  
Янгаларига салом.  
Аёллар: Балли қуллуқ, ҳазор алик!

Кайвони: Мачитимиз йўлида,  
Жойнамози қўлида,  
Келин салом бир салом,  
Боболарига салом.  
Аёллар: Балли қуллуқ, ҳазор алик!

---

<sup>1</sup> Қўтан — қўйларни қамаб қўядиган махсус жой: қўра, қўйхона.

<sup>2</sup> Уйрилган — ўймалашган..

Кайвони: Токчадаги совундай,  
Ичи тушган қовундай,  
Келин салом бир салом,  
Момоларига салом.  
Аёллар: Балли қуллуқ, ҳазор алик!

Кайвони: Тоғдан ўтин ташиган,  
Айланиб бошини қашиган,  
Келин салом бир салом,  
Қайин укаларига салом.  
Аёллар: Балли қуллуқ, ҳазор алик! (5)



*Хотамова Ойим*



*Муродалиева Зумрад*



*Хотамов Нарзулло*



*Салаева Нурбаби*



*Соатова Ҳайитгул*



*Янгибоев Абдуҳамид*



*Содиқова Майсара*



*Нўлатова Хурсаной*

*Манбалар кўрсаткичи:*

## **АЛЛАЛАР**

(1) – Сурхондарё вилояти, Узун туман Ж.Эшмирзаев жамоа хўжалигида истиқомат қилувчи 1929 йилда туғилган Тургунова Аширгул момодан 2003 йил май ойида М.Наимов ёзиб олган.

(2) Сурхондарё вилояти, Денов туман, Фалаба жамоа хўжалигида истиқомат қилувчи 1925 йилда туғилган Содикова Майсара момодан 2003 йил сентябрь ойида М.Наимов ёзиб олган.

(3) Сурхондарё вилояти, Олтинсой туман Катта Вахшивор ширкат хўжалигида истиқомат қилувчи 1930 йилда туғилган Хотамова Ойим момодан 2003 йил сентябрь ойида М.Наимов ёзиб олган.

(4) Сурхондарё вилояти, Олгинсой туман Катта Вахшивор ширкат хўжалигида истиқомат қилувчи 1926 йилда туғилган Қораева Зайнаб момодан 2003 йил сентябрь ойида М.Наимов ёзиб олган.

(5) X.Faфуров. “Халқ ўйинлари, қўшиқлари ва анъанааларига бир назар. Тошкент: Камалак, 1992. – 52-бет.

(6) Сурхондарё вилояти, Шўрчи туман Ижтимоят жамоа хўжалигида истиқомат қилувчи 1952 йилда туғилган Соатова Ҳайитгулдан 2003 йил октябрь ойида М.Наимов ёзиб олган.

(7) Сурхондарё вилояти, Денов туман Ш.Худойназаров жамоа хўжалигида истиқомат қилувчи 1948 йилда туғилган Пўлатова Хурсаной момодан 2003 йил октябрь ойида М.Наимов ёзиб олган.

(8) Сурхондарё вилояти, Денов туман Мустақиллик жамоа хўжалигида истиқомат қилувчи 1960 йилда туғилган Раҳмонқулова Махбубадан 2002 йил март ойида М.Наимов ёзиб олган.

## **ХЎЙО-ХУЙ**

(1), (2) Сурхондарё вилояти, Шўрчи туман Ижтимоят жамоа хўжалигида истиқомат қилувчи 1936 йилда туғилган Янгибоев Абдуҳамид бободан 2003 йил октябрь ойида М.Наимов ёзиб олган.

(3) Сурхондарё вилояти, Олгинсой туман Катта Вахшивор қишлоғида истиқомат қилувчи 1940 йилда туғилган Хотамов Нарзуллодан 2003 йил ноябрь ойида М.Наимов ёзиб олган.

## **“ЕР-ЕР”**

(1) Сурхондарё вилояти, Денов туман Ўшор қишлоғида истиқомат қилувчи 1956 йилда туғилган Раҳимова Ҳабиба опадан 2003 йил май ойида М.Наимов ёзиб олган.

(2) Сурхондарё вилояти, Денов туман Ш.Қобилов жамоа хўжалигида истиқомат қилувчи 1913 йилда туғилган Муроталиева Зумрад момодан 2003 йил август ойида М.Наимов ёзиб олган.

(3) Сурхондарё вилояти, Олтинсой туман Катта Вахшивор ширкат хўжалигида истиқомат қилувчи 1930 йилда туғилган Хотамова Ойим момодан 2003 йил сентябрь ойида М.Наимов ёзиб олган.

(4) Сурхондарё вилояти, Олтинсой туман Катта Вахшивор ширкат хўжалигида истиқомат қилувчи 1930 йилда туғилган Хотамова Ойим момодан 2003 йил сентябрь ойида М.Наимов ёзиб олган.

## **КЕЛИН САЛОМ**

(1) Сурхондарё вилояти, Денов туман Ўшор қишлоғида истиқомат қилувчи 1956 йилда туғилган Раҳимова Ҳабиба опадан 2003 йил май ойида М.Наимов ёзиб олган.

(2) Сурхондарё вилояти, Денов туман Қ.Каримов жамоа хўжалиги Ойбарик қишлоғида истиқомат қилувчи 1935 йилда туғилган Солаева Нурбиби момодан 2003 йил ноябрь ойида М.Наимов ёзиб олган.

(3) Сурхондарё вилояти, Денов туман Ш.Худойназаров жамоа хўжалигида истиқомат қилувчи 1948 йилда туғилган Пўлатова Хурсаной момодан 2003 йил октябрь ойида М.Наимов ёзиб олган.

(4) Сурхондарё вилояти, Денов туман Ш.Қобилов жамоа хўжалигида истиқомат қилувчи 1913 йилда туғилган Муроталиева Зумрад момодан 2003 йил август ойида М.Наимов ёзиб олган.

(5) Сурхондарё вилояти, Олтинсой туман Катта Вахшивор ширкат хўжалигида истиқомат қилувчи 1930 йилда туғилган Хотамова Ойим момодан 2003 йил сентябрь ойида М.Наимов ёзиб олган.

## **МУНДАРИЖА**

М.Жўраев. Асрларга бўйдош қўшиқлар .....	3
Алалар .....	7
Хуй-йо хуй .....	15
Ёр-ёр .....	19
Келин салом .....	26
Манбалар кўрсаткичи .....	38

---

Босишига руҳсат этилди 03.04.2006 й. Бичими 60×84  $\frac{1}{16}$ . Адади 500 нусха.  
Гарнитура Таймс Тад. Шартли босма табори 2,5. Буюртма № 42.

«MirINFORM» МЧЖ  
босмахонасида чоп этилди.  
Тошкент ш., Мустакиллик майдони, 2  
Тел.: 1282763